

皇
清
經
解

金

清

經

解

皇清經解卷一千二百八十六

學海堂

春秋公羊經何氏釋例

武進劉禮部

逢祿著

朝聘會盟例弟十五

隱十有一年滕侯薛侯來朝傳諸侯來曰朝大夫來曰聘注不言朝公者禮朝受之於太廟與聘同義

桓五年州公如曹六年正月寔來傳慢之化我也注行過無禮謂之化齊人語也諸侯相過至竟必假塗入都必朝所以崇禮讓絕慢易戒不虞也

七年穀伯綏來朝鄧侯吾離來朝傳失地之君也稱侯朝貴者無後待之以初也

九年曹伯使其世子射姑來朝傳世子言朝譏父老子代從政

莊二十三年蕭叔朝公傳公在外也注惡不受於廟
僖二十八年公朝于王所傳不言如京師天子在是也不言天
子在不與致天子也

右朝

隱七年齊侯使其弟年來聘注來聘書者皆喜內見聘事也古
者諸侯朝罷朝聘爲慕賢考禮一法度尊天子不言聘公者禮
聘受之於太廟孝子謙不敢以己當之歸美於先君且重賓也
天王使凡伯來聘注書者喜之也古者諸侯有較德殊風異行
天子聘問之當北面稱臣受之於太廟所以尊王命歸美於先
君不敢以己當之

莊二十三年祭叔來聘注不稱使者公一陳佗故絕使若我無

君因不與天子下聘小人

二十五年公子友如陳注內朝聘言如者尊內也書者錄內所交接也朝京師大國善有加錄文如楚有危文聘無月者比於朝輕

文元年叔孫得臣如京師注知不爲喪聘書者聘爲貢職天子當得異方之物以事宗廟又欲以知君父無恙不以喪廢故不譏也如他國就不三年一譏而已

右聘

隱二年公會戎于潛注凡書會者惡其虛內務恃外好也古者諸侯非朝時不得踰竟

桓二年蔡侯鄭伯會于鄧傳離不言會蓋鄧與會爾注二國會

曰離二人議各是其所是非其所非所道不同不能決事定是非立善惡不足采取故謂之離會自三國以上言會者重其少從多也能決事定是非立善惡尙書曰三人議則從二人之言蓋取諸此

五年齊侯鄭伯如紀傳外相如不書書離不言會也注嫌外離會常書故變文見意以別嫌明疑

僖二十八年陳侯如會傳後會也

宣元年會晉師于斐林傳不言趙盾之師君不會大夫之辭也昭十二年傳春秋之信史也其序則齊桓晉文其會則主會者爲之也注唯齊桓晉文能以德優劣國大小相次序非齊桓晉文則知主會者爲之雖優劣大小不改更信史也

定十四年邾婁子來會公注書者非邾婁子會人於都也如入
人都當修朝禮古者諸侯將朝天子必先會開隙之地考德行
一刑法講禮讓正文章習事天子之儀尊京師重法度恐過誤
言公者不受於廟

哀十三年公會晉侯及吳子于黃池傳吳主會也先言晉侯不
與夷狄之主中國也

右會

隱四年公及宋公遇于清傳遇者不期也一君出一君要之也
注古者有遇禮爲朝天子若朝罷朝卒相遇於塗近者爲主遠
者爲賓稱先君以相接所以崇禮讓絕慢易也當春秋時出入
無度禍亂奸宄多在不虞無故卒然相要小人將以生心故重

而書之所以防禍原也言及起公要之

桓十年公會衛侯于桃邱弗遇傳會期辭也言弗遇公不見要也

右遇

隱元年公及邾婁儀父盟于昧傳會及暨皆與也會猶最也及猶汲汲也暨猶暨暨也及我欲之暨不得已也注凡書盟者惡之也爲其約誓大甚朋黨深背之生患禍重胥命善近正是也及宋人盟于宿傳內之微者也注內者謂魯也微者謂士也不名者略微也

桓三年齊侯衛侯胥命于蒲傳相命近正也古者不盟結言而退注書以撥亂也

十四年鄭伯使其弟語來盟注來盟者聘而盟也不言聘舉重也

莊九年公及齊大夫盟于薳

十六年同盟于幽傳同盟者何同欲也注同心爲善善必成同心爲惡惡必成

閔二年齊高子來盟傳不稱使我無君也注正其義明君臣無相適之道春秋謹於別尊卑理嫌疑故絕去使文以起事張例則所謂君不使乎大夫也

僖三年公子友如齊莅盟傳莅盟者往盟乎彼也來盟者來盟於我也

五年諸侯盟于首戴傳諸侯不序一事而再見者先目而後凡

也注會盟一事不舉重者時世子不與盟

案葵邱宰周公不與盟同例

鄭伯逃歸不盟傳不可使盟也言逃歸不以寡犯衆也

八年鄭伯乞盟傳處其所而請與也蓋酌之也注時鄭伯欲與楚不肯自來盟處其國遣使挹取其血而請與之約束無汲汲慕中國之心故抑之使若叩頭乞盟者也不錄使者方抑鄭伯使若自來也不盟不爲大惡者古者不盟也

十九年鄆子會盟于邾婁傳後會也

成三年晉侯使荀庚來聘衛侯使孫良夫來聘丙午及荀庚盟丁未及孫良夫盟傳聘而言盟者尋舊盟也注以不舉重連聘言之知尋繹舊故約誓也書者惡之二國既修禮相聘不能相親信故舉聘以非之

右盟

昭七年暨齊平注書者善錄內也不出主名者君相與平國中皆安故以舉國體言之

右平

釋曰傳曰古者諸侯必有會聚之事相朝聘之道號辭必稱先君以相接又曰諸侯時朝乎天子天子之郊皆有朝宿之邑焉何君注云順四時而朝也緣臣子之心莫不欲朝朝莫夕王者與諸侯別治勢不得自專朝故卽位比年使大夫小聘三年使上卿大聘四年又使大夫小聘五年一朝王者亦貴得天下之歡心以事其先王因助祭以述其職故分四方諸侯爲五部部有四輩輩主一時孝經曰四海之內各以其

職來助祭尚書曰羣后四朝敷奏以言明試以功車服以庸
是也其諸侯相朝亦以五年近得正宣公九年如齊加錄書
月是也而王世子宰周公出會則譏之諸侯相遇則危之屢
盟長亂則刺之然則周官言春朝秋覲夏宗冬遇又有時會
殷同徧存徧頰徧省諸禮諸侯世然後相朝殷然後相聘司
盟掌盟約之載豈平世之法與撥亂異耶然傳言古者不盟
唯有會聚朝聘之道穀梁子亦云盟詛不及三王則周官殆
戰國陰謀瀆亂不驗之書也康成不通春秋而信之篤過矣
注曰非朝不踰竟然則同盟摯伐使臣非禮奔命于路亦春
秋之所刺也故其始則大小相陵徵朝徵聘繼則強臣擅命
要結外援勢使然也春秋防其漸故謹其始魯桓與鄭會垂

盟越而叛王之事亟矣公子遂遂如晉季孫宿遂入運公子遂叔孫得臣如齊而篡弑之禍亟矣會稷而宋亂遂成盟平邱而楚亂遂成矣故壞法亂紀之事必託于常禮而後成夫禮以已亂也非以階厲也故君子辨之

崩薨卒葬例第十六

公薨葬見公終始例內外夫人內外女薨卒葬見娶歸終始例諸侯

卒葬

見表

隱三年天王崩傳天子記崩不記葬必其時也諸侯記卒記葬有天子存不得必其時也天子曰崩諸侯曰薨大夫曰卒士曰不祿注書崩者爲天下恩痛王者也記諸侯卒葬者王者亦當加之以恩禮

莊三年葬桓王傳改葬也注諸侯當有恩禮

文九年葬襄王傳王者不書葬不及時書過時書我有往者則書注惡公不自往

隱三年八月庚辰宋公和卒注不言薨者春秋王魯不可言崩故貶外言卒所以褒內也

癸未葬宋繆公傳葬或日或不日不及時而日渴葬也不日慢葬也過時而日隱之也不日謂之不能葬也當時而不日正也日危不得葬也

八年葬蔡宣公傳卒名而葬不名卒從正而葬從主人卒日而葬不日卒赴而葬不告注卒當赴告天子君前臣名故從君臣之正義言也葬有常月不告故從臣子詞稱公

十四諸侯終始表第十七十八

余覽春秋所治冠帶之倫東窮齊並海南極吳楚西通秦隴北
絕燕晉卓哉煌煌聲名之屈何其侈也深探其本皆詳內以畧
外究王化之盛一統中外未嘗不殊會夷狄頓胡沈越之邦未
嘗通吉凶聘問之禮其於諸夏挺大小侯各七以張治法而已
形勢雖强要以仁義爲本允哉允哉嘗聞賈生之論建侯矣欲
天下之久安長治莫若衆建而少其力力少則易使以義國小
則無邪心斯古今之通論也余讀春秋彊侵弱衆陵寡離爲十
二合爲六七晉歸三卿齊移田氏秦政乃利觜長距終得擅場
皿蟲爲蠱其勢然也故諸侯侈則大夫偪中國微則戎狄橫春
秋本殷周方三千里以爲諸夏撻殷武以奮伐錫厥福於封建
不僭不濫赫聲濯靈廓如也故嘗論之中國齊晉最彊也晉弑

君五

夷齊卓子懷公靈公厲公

篡國四

惠公文公成公悼公

齊弑君六

諸兒子糾舍商人光舍

篡

國五

小白商人元處白陽生

魯篡齊晉則弑君五

隱公桓公子般閔公子赤

篡國三

桓公

宣公

宋衛陳蔡鄭匹也皆弑君二

宋與夷處曰衛完剽陳平國世子偃師蔡固申鄭夷髡原

若其篡逐出入遽數不能終也夷狄吳楚最彊也皆弑君二

楚

虔吳餘祭僚

秦於春秋乃在小國治耳

見哀三年注

曹許邾婁滕杞無兼

并之事無弑立之文非其性異人也亦形勢然也春秋之義諸

侯不得專殺臣不討賊篡不明殺無罪三者皆去葬殺無罪罪

君也不討賊罪臣也篡則君臣皆罪之而絕其國故吾以為繼

體守文之才僅得中佐明春秋之法以制馭其政三代之治未

嘗不可復其亂未嘗不可弭則經制定而統紀一雖有淫驕之

主而無魚爛之禍封建之於治如宮室之有楹舟之有維楫柞

枝之有葉也其可一日去哉

秦楚吳進黜表第十九

余覽春秋進黜吳楚之末未嘗不歎聖人馭外之意至深且密也昔聖人序東周之書唯存文侯之命及秦誓著其盛衰大旨其於刪詩則列秦於風序兼葭曰未能用周禮序終南曰能取周地然則代周而改周法者斷自秦始何其辭之博深切明也秦始小國僻遠諸夏擯之比於戎狄然其地爲周之舊有文武貞信之教無敖僻驕侈之志亦無淫佚昏惰之風故於詩爲夏聲其在春秋無僭王滑夏之行亦無君臣篡弑之禍故春秋以小國治之內之也吳通上國最後而其強也最驟故亡也忽焉秦強於內治敗殺之後不勤遠畧故興也勃焉楚之長駕遠馭